

Aatsitassanut Inatsisit Atuutsinneqarnerannut
Naalakkersuisoqarfik
Departementet for Råstoffer og Justitsområdet

NAALAKKERSUISUT
GOVERNMENT OF GREENLAND



Inatsiseqarnermut ministereqarfik
Nordatlantkontoret

Att. Marie Mølsted

Ulloq: 17.03.2023
Suliap normua: 2019 - 24614

Postboks 930
3900 Nuuk
Oqarasuaat. (+299) 34 68 00
E-mail: asn@nanoq.gl
www.naalakkersuisut.gl

Kalaallit Nunaannut 2023-imi suliassat pingaarnersiorneqarnissaat pillugit Inatsiseqarnermut ministereqarfimmut allagaq

2021-imi aamma 2022-imi immikkoortut pingaarnersiorneqartussat Naalakkersuisut noqqaassutigisimasaat pillugit killiffiit pillugit Inatsiseqarnermut ministereqarfik allakkanik 24. februaari 2023 ullulerneqarsimasunik nassiussisimavoq.

Tassunga atatillugu, suliassat allat Naalakkersuisut pingaarnersiorneqarnissaa kissaatigeneraat Inatsiseqarnermut ministereqarfiup noqqaassutigaa.

Kalaallit Nunaanni innuttaasut Danmarkimi innuttaasutulli inatsisitigut illersorneqarnermik aamma piumasagaatinik assinginik pineqarnissaat aallaviusariaqarmat, aallaqqaasiullugu Naalakkersuisut erseqqissaatigissavaat. Taamaammat naalagaaffimmi tamanut piumasagaatit naligiinnissaasa qulakkeerneqarnissaat pingaarnersiunerit tullerriaarneqarneranni pingaarnarpaat ilagisariaqarpaat, aamma inatsisit atuutsinneqarnerannut suliassaqrifiup suliassaqrifiullu allat, naalagaaffimmi oqartussaasut akisussaaffiisa ataanniittut, qallunaat killiffiisa assinginut killinnissaat ingerlajuaannartumik sulissutigisariaqarpoq.

Immikkoortut Naalakkersuisut siusinnerusukkat pingaarnersiorneqartussat kissaatigisimasaat, aamma suli naammassineqarsimangitsut, ingerlateqqinneqarnissaat Naalakkersuisut erseqqissassavaat.

Ministereqarfimmi isumalluutit pillugit unammilligassaqraneq pissutigalugu inatsisiliormik suliniutit pingaarutillit pisariaqartullu kinguartinneqartarnerat Naalakkersuisut akuerisinnaangimmassuk, tassunga atatillugu Naalakkersuisunut pingaaruteqarpoq erseqqissassallugu.

Pinerluutit immikkut ittumik ilungersunartut pineqartillugit, pinerluttulerinermi inatsimmi § 147-imi pineqaatissiinermut killiliussap ukiunit 10-nit ukiunut 16-inut qaffanneqarnissaa, inatsiseqarnermut ministerinut assigiinngitsunut 2. juni 2019-

ip kingorna allakkani aamma ukiumoortumik pingaarnersiuinissaq pillugu allani Naalakkersuisut uteqqiattumik noqqaassutigisarsimavaat.

“Kalaallit Nunaanni inissiisarfiit imaqarsinnaassusaasa artorsartinneqarnerat pissutigalugu Naalakkersuisunit kissaatip massuma aaqqiissutissinnissaa naammassiuminaallisissimavaa, aamma Naalakkersuisut 2021-imut 2022-imullu pingaarnersiunerisa suliarineqarnerisa peqatigisaannik suliap siumut ingerlateqqinneqarsinnaanera periarfissaasimannngilaq. 2023-imut pingaarnersiunerminni suliaq ilanngutissagaat Naalakkersuisunut qinnutigineqarpoq.” inatsiseqarnermut ministereqarfiup allakkamini 24. februaari 2023-imi ullulernerqarsimasumi taavaa.

Inatsiseqarnermut ministereqarfiup 2023-imut inatsisiliassanut programmianut tunngavilersuut atarpasinngilaq, tassanimi qulequttap uuma “inatsiseqartitsinermit politikkeqarnermut suliaasaqarfimmi qitiusumik politikikkut pingaarnersiunerit” ataani taaneqarpoq **Parnaarussiviit imaqqortussusaasa inatsiseqartitsinermit politikki aalajangissannngilaat.**

Kalaallit Nunaanni inatsiseqartitsinermit politikkimut tunngatillugu tamanna aamma Naalakkersuisut isumaat malillugu atuuttariaqarpoq, aamma pinerluttulerinermi inatsimmi § 147-imi pineqaatissiisarnerup qaffanneqarnissaanik kissaat **annertuumik pingaartinneqartussatut aalajangiusimaneqarpoq.**

2023-imut immikkoortut tulliuttut **suli allat** pingaarnersiorneqartussatut Naalakkersuisut kissaatigaat (tulleriiarneqarneri pingaarnersiorneqannngillat):

- Malersuineq akiorniarlugu suliniutit patajaallisaavigineqarnerat – Kalaallit Nunaanni Eqqartuussiveqarneq pillugu Siunnersuisoqatigiit innersuussuussutaattut pinerluttulerinermi inatsimmi aalajangersagaq aamma anisitsisarnerlu pillugu inatsimmi allannguinerit
- Meeqqat kinguaassiutitigut atonerlunneqartarnerinut akiuniarnermi suliniutit patajaallisaavigineqarnerat – (inuk 22-it sinnerlugit ukiulik meeqqamik 15-it inorlugit ukiulimmik atoqateqarpat, pinngitsaaliineruvoq) – pinerluttulerinermi inatsimmi aalajangersagaq aamma pingaarnersiuinissaq pillugu allakkami qupperneq 6-imi taaneqartut digitaliusumik isumapiloqarneq tunngavigalugu tatiginnilersitsiniaaneq (grooming) pillugu inatsisissanut ataatsimoortunut suli allanik immikkoortunik tallimanik nutarterineq.
- Politeeqarfinni allanisut pigineqartutut eqqugaasunut siunnersuisarfinnik pilersitsineq
- Kalaallit Nunaanni Politiit internetimi qupperisaga kalaallisoortoq

- Pissutsit sukannerulersitsisut pillugit qallunaat pillaasarnermik inatsisaanni § 81-ip assinganik pinerluttulerinermi inatsimmi aalajangersakkamik ilanngussineq, taamaalilluni ilaatigut uumissuineq tunngavigalugu pinerluuteqarnerit ilanngunneqarniassammata.
- Kalaallit Nunaata Istanbul-imi isumaqatigiisummik akuersissuteqarnera
- Imm. 4-imi taaneqartutut pisuussutit pillugit inatsiseqartitsinerup tiguneqarnera
- Inatsisitigut takussutissiani digitaliusumik atsiornerit – Kalaallit Nunaanni Eqqartuussisarnermik inatsimmi aalajangersagaq.
- Atuisut suliffeqarfiillu akornanni digitaliusumik isumaqatigiissusiorsinnaanerup akuerineqarnissaa siunertaralugu atuisut illersorneqarnissaannut inatsisit nutarterneqarnerat
- Napparsimasut angallanneqarnerannut akisussaasuunerup aamma Search and rescue-p (SAR)-ip akornanni attuumaffik:
- Inuit akornanni saqitsaannernik suliat suliarineqartarnerat pillugit Eqqartuussisarnermik inatsisip aalajangersagartaasa (ingammik aningaasanik akiliisitsiniartarneq)

Internetimi pinerluuteqartarnerit pinerluttoqarsimaneranik misissuiffigineqartarnissaannut periarfissat patajaallisaaviginiarlugit inatsisissatut siunnersuut 2023-imi ukiakkut Inatsisartut ataatsimiinnissaannut saqqummiussassaq maanna suliarigitsik, Inatsiseqarnermut ministereqarfiup paasissutissiissutigisimavaa. Tamatuma peqatigisaanik isumapiloqarneq tunngavigalugu tatiginnilersitsiniaaneq (grooming) pillugu pinerluttulerinermi inatsimmi ilanngussisoqarnissaa pillugu siunnersuummik suliaqartoqarpoq. Tamatuma peqatigisaanik politiit digitaliusumik innarliisarnernik isumaginnissinnaanermut ilinniartinneqarnissaasa qulakkeerneqarnissaa pissusissamisuussaaq, tamannalu massakkut Inatsiseqarnermut ministereqarfimmut allakkut erseqqissarneqarpoq. Inatsisissatut siunnersuutit suliarineqarnerannut atatillugu aningaasaliissutinik naammattunik immikkoortitsisoqarnissaa taamaalillutik Naalakkersuisut noqqaassutigivaat.

Inussiarnersumik inuullaqqusillunga

Jørgen T. Hammeken-Holm
Naalakkersuisoqarfimmi pisortaq